

毛

詩

序

說

毛詩序說題辭

詩自朱傳行。而古序塵度閣矣。朱
子未改古序之先。譏古序為鑿。既
改古序之後。人疑朱傳為猜。然譏
古序而不求所以是。疑朱傳而不
辨所以非。人誰適從。天下義理。豈

量易而折衷難。兩物質而後功。苦
見兩^兩造^造具^具而後曲直分。余取古序
朱傳參兩為毛詩序說。舍詩說序
者。序志而詩則辭也。孟子云。善說
詩者。不以辭害志。以意逆志。是謂
得之。志得而辭可旁通矣。夫說詩

與說他文字異。他文字切直為精。
核。詩含蓄為溫厚。古序得其含蓄。
朱傳主於切直。反以含蓄為鑿空。
三百古序。無一足解頤者矣。人非
賜商。未可與言詩。余幼承師說。守
功令。何敢自異。偶閱古序。覺食芹

美。人各有心。問之同學。可則與衆
公之。若其否也。野人無知。博一笑
而已。其敢有它。

天啓五年七月初三日郝敬識

毛詩序說目錄

國風

卷之一

周南

召南

卷之二

邶

鄘

衛

王

卷之三

鄭

齊

魏

唐

秦

陳

檜

曹

豳

小雅

卷之四

鹿鳴之什

南有嘉魚之什

卷之五

鴻鴈之什

節南山之什

谷風之什

甫田之什

魚藻之什

大雅

卷之六

文王之什

生民之什

卷之七

蕩之什

三頌

卷之八

周頌

魯頌

商頌

目錄終

山草堂集第五

內編

毛詩序說卷之一

京山郝敬學 男洪範輯

侄千里

門人彭大翮全校

國風

說曰撓萬物者莫疾乎風。風者有聲無形而能動物。易巽爲風。爲入。巽者順也。巽言易入。故首以命詩國風。周列國詩也。古之王者采

詩以觀民風故家邦之詩曰風風之爲體飄
姚和動雅之爲體詳允端慤頌之爲體湛靜
莊嚴若夫關雎麟趾之類則風雅頌之義備
矣雅頌未有無風而能動人者故六義首風
然僅十五國何也周衰詩亡聖人所刪訂者
止此耳以十五國槩方內風俗大畧可觀矣
周南

說曰周岐豐也周家王業始造之地故以首
風文王以聖德治岐豐化行梁荆梁荆在岐

豈之東南故曰南不言北者紂都在北文王三分有二正東南之間也言周召者文王之世周公治內召公治外畿內曰周畿外曰召言南者指政教所及皆周有天下後追誦其事今世世師文王也然古序不言文王言后妃何也化始宮幃言后妃皆文王也如言四時百物卽天也朱子執此短序非也

古序曰關雎后妃之德也毛公曰風之始也所以風天下而正夫婦也故用之鄉人焉用之邦

國焉。風風也。教也。風以動之。教以化之。詩者。志之所之也。在心爲志。發言爲詩。情動於中而形於言。言之不足。故嗟歎之。嗟歎之不足。故永歌之。永歌之不足。不知手之舞之。足之蹈之也。情發於聲。聲成文。謂之音。治世之音安以樂。其政和。亂世之音怨以怒。其政乖。亡國之音哀以思。其民困。故正得失。動天地。感鬼神。莫近于詩。先王以是經夫婦。成孝敬。厚人倫。美教化。移風俗。故詩有六義焉。一曰風。二曰賦。三曰比。四曰興。

五曰雅。六曰頌。上以風化下，下以風刺上。主文而譏諷，言之者無罪，聞之者足以戒。故曰風至，於王道衰，禮義廢，政教失，國異政，家殊俗，而變風變雅作矣。國史明乎得失之迹，傷人倫之廢，哀刑政之苛，吟詠情性，以風其上，達于事變，而懷其舊俗者也。故變風發乎情，止乎禮義；發乎情，民之性也；止乎禮義，先王之澤也。是以一國之事，繫一人之本，謂之風。言天下之事，形四方之風，謂之雅。雅者，正也。言王政之所由廢興也。

政有大小故有小雅焉有大雅焉頌者美盛德
之形容以其成功告于神明者也是謂四始詩
之至也然則關雎麟趾之化王者之風故繫之
周公南言化自北而南也鵲巢騶虞之德諸侯
之風也先王之所以教故繫之召公周南召南
正始之道王化之基是以關雎樂得淑女以配
君子憂在進賢不淫其色哀窈窕思賢才而無
傷善之心焉是關雎之義也

說曰凡詩序首句舉三百本事鄭玄所謂逐

篇之小序也。謂爲子夏與毛公合作。非也。或是當世掌故之舊目。或是夫子刪正之舊文。以下申首句未盡之義。則爲毛公作。是也。乃其所以爲毛氏之學也。今加毛公曰三字。別之。玄又謂關雎序。自風風教也。以下爲三百篇大序。子夏作。亦非也。毛公序說。多游演旁通。而關雎首三百。故於此總論全經大旨。末仍歸關雎。本屬一篇。而朱子割取詩者志之所之。以下至詩之至也。別爲大序。今依古本。

合之皆毛公作也各篇古序惟首一句耳此篇云后妃之德者何也女德無極不妬爲本妬生于淫淫妬則衆惡皆歸關雎好逮言其不妬也荇菜思服言其內官備職淑女同心共承宗廟仁孝和敬之至也禮王者一娶十二女六宮之屬百有二十人祭統云官備則具備蠶織衣服酒醴粢盛薦豆和羹之事皆后妃主之而內官左右相之也恆情女入宮見妬惟賢妃能寤寐求賢憂宗廟乏人中饋

闕事君寵偏醜而胤嗣不廣所謂愛在進賢
不淫其色哀窈窕思賢才而無傷善之心者
此也故曰后妃之德也然周南本文王之詩
而文王之妃則大妣也古序不言大妣言后
妃何也曰二南之作凡爲天子諸侯大夫士
庶人脩身齊家之法也以文王風之非專爲
美文王大妣作也其曰后妃之德者言凡爲
王后妃者皆當如是也故鵲巢亦曰夫人之
德言凡爲君夫人者皆當如是也大抵二南

作于王業成後。揚祖德訓後嗣。而朱子謂此篇爲王季宮人喜文王得大姒作。尤非也。果爾。宮人好德。與后妃何預。三百篇好德之詩不少。樂不淫。哀不傷。何獨一關雎也。關雎化行。文王三分有二矣。不應大姒初嫁來。便有關雎也。其詠雎鳩何也。六義所謂比也。雎鳩鳥名。卽布穀也。狀似鷹。月令仲春。鷹化爲鳩。季秋。鳩化爲鷹。夏小正云。二月化鳩。五月化鷹。列禦寇云。鷦爲鷽。鷽爲布穀。布穀父復化。

爲鷦其目睢然故名睢鳩其鳴勸耕故名布穀布穀鳴農務興天子耕籍以供粢盛王后蠶繅以爲衣服禮仲春王后率內外命婦始蠶于北郊率六宮之人生種稌之種獻于王勸籍凡宗廟祭祀男女昏姻皆于仲春故以睢鳩比然鳥類多矣獨取睢鳩何也鳩之言聚也鳥惟鳩多族而睢鳩乘陽氣變化與他鳩異故以爲王后妃之比在河洲何也幽鳥不集塵市古國有公桑蠶室擇近水地爲之

卜三宮夫人世婦之吉者使入蠶室奉種浴于川二南皆作于周公制禮之時中都既建大河當其北卽公桑之北郊蠶室也雉鳩鳴春冰泮河水方生德莫平于水量莫廣于河河洲平曠羣鳥飛集飲啄其中所謂不爭之地不妬之比也次言行菜何也行蘋藻之屬宗廟之禮有釋菜有豆菹有和羹皆用菜荇水草明潔可薦春秋傳云蘋蘩蕰藻之菜可羞于鬼神祭則后妃薦豆故以荇菜比也謂

之比何也。詩言微婉，託物爲比。陳辭爲賦，感
勤爲興。三義合而成詩。朱子斷以某詩爲賦，
某詩爲興，某詩爲比，非也。詩有無比者，未有
無賦與興者。比不離興，比興不離賦。古註未
達，而朱子以興爲先，言他物興起所詠之事，
與比何別乎？子云：詩可以興，豈謂其可以先
言他物乎？舛誤難通。○詩通關雎：二南思過
半矣。本詠后妃之德，而渾然不露，託雎鳩行
業爲比，內官蠶織桑盛籩豆祭祀禮樂無所

不備勤儉之節。溫厚之性。仁孝誠敬之思。悠然可想。衽席易溺。而能寤寐思賢。反側不安。不淫不妬。尤爲女德之先。風教之本也。夫子贊其樂。不淫哀不傷。以此。朱子謂爲宮人哀樂。於后妃何預乎。然亦不自后妃始也。惟王者有十夢求賢之思。而後后妃有關雎之德。惟王者有卑服康功之志。而後后妃有葛覃之本。故曰身不行道。不能行於妻子。觀后妃而王道始基矣。此夫子定二南之意也。

古序曰葛覃后妃之本也。毛公曰后妃在父母家則志在於女功之事。躬儉節用。服澣濯之衣。尊敬師傅。則可以歸安父母。化天下以婦道也。說曰宋子改爲后妃治葛旣成而自賦其事。非也。蓋關雎母儀之事也。葛覃處女之事也。未嫁爲賢女。則旣嫁爲賢婦。故葛覃爲之本。大明云文王嘉止。大邦有子。倪天之妹。女少曰妹。此章所謂倪天之妹者也。關雎兼言蠶事。此章專言績事。蠶絲以供禮服。葛麻以供

常服恆居無羅紈不厭布縷嫁時無靡麗不
棄澣濯采葛刈獲紡紝縫洗不辭親執言語
服飾必諮師保歸事舅姑無異父母勤儉之
節恭順之性仁孝之心備矣有女如此以爲
婦可以事舅姑以爲后可以母天下序說是
也朱子因無贊美之辭遂謂爲后妃自作矣
二南皆先王所以垂訓爲齊家治國之道非
爲贊美作也有贊謂之美無贊謂之自作朱
子說詩大都如此○詩與傳記異事不必據

語不必詳而情景躍然風人之致也葛覃僅七十餘字而賢女勤儉之節孝敬之心宛然可想朱子以爲文王后妃自叙計二南成時大姒老且薨矣所稱中谷刈穫黃鳥灌木聞聲見色一一覈實豈非高叟之爲詩歟

古序曰卷耳后妃之志也毛公曰又當輔佐君子求賢審官知臣下之勤勞內有進賢之志而無險詖私謁之心朝夕思念至于憂勤也

說曰婦人以縫衣裳冪酒漿爲事葛覃衣裳

也。卷耳，酒漿也。卷耳之草，可爲麴藥，因酒漿
念及使臣，故有進賢之志。策馬登陟，皆使臣
之事也。后妃而思酌使臣酒，何也？禮王者獻
賓，則后妃亞獻。小雅之四牡皇華，采薇杖杜，
遣勞使臣，皆王者所以饗諸臣于外廷也。卷
耳，則后妃所以相王于中壺也。卷耳之志，是
采薇杖杜之治所出也。志在箴規義取，卷耳
以諷其聽也。陳風東門之枌，曰彼美淑姬，可
與晤歌，則莫如卷耳之歌矣。小雅閭闔曰辰

彼碩女。今德來教。若卷耳者。可謂德教矣。
爲天子后妃者。志當如是。故曰后妃之志也。
朱子改爲后妃思念君子而作。以婦人思君
子爲貞靜專一之至。非也。婦人不念其夫而
誰念乎。婦人念其夫者多矣。孰能爲卷耳者
乎。升高望夫。馳馬登山。飲酒消憂。幾乎蕩矣。
縱謂託詠亦何以異于鄭衛之聲乎。或者謂
婦人勿預外事。然則雞鳴之解佩。十亂之邑
姜。胥宇之太姜。非乎。婦稱內助。不此之助。而

安所取助乎不越酒食不及爵賞借中饋以效箴故謂之志云爾豈婦無公事休其蠶織之謂哉○關雎備厚載之德葛覃修內政之本卷耳懷進賢之志后妃所以相君子者至矣詩人託興微婉懿範徽音千古如在正使大姒自道不能有加而朱子據篇內我字遂以爲大姒自叙固矣

古序曰樛木后妃逮下也毛公曰言能逮下而無嫉妬之心焉

說曰此詩人詠歌之辭朱子改爲衆妾稱願而作非也其言南有樛木何也南方陽明故詩美多比南北方幽暗詩刺多比北木垂枝曰樛樛木下接葛藟上附象后妃逮下衆妾親上二語賦比興三義具矣朱子謂先言他物興起所詠之事然則樛木二語先言他物也其所詠之事安在他篇可以類推○關雎以下三篇曰德曰志曰本皆言后妃之賢也此篇言其福履下篇遂及所生漸被國人致

興王之瑞達化之序也

古序曰螽斯后妃子孫衆多也毛公曰言若螽斯不妬忌則子孫衆多也

說曰此亦詩人詠歌之辭朱子以爲卽衆妾自作非也其以螽斯比何也螽斯蛇蟺生子最多凡血氣之類不和則不能羣羣處則蕃息善羣莫如螽斯后妃慈和以羣衆妾而多子故以螽斯比然辭意隱約于螽斯詠其羣不言和而其和可知于后妃詠其子孫多不

言羣而其羣可知。不直稱君子而但指螽斯贊歎微婉深厚。悠然可想。朱子謂爲比是也。然以螽斯比卽是以螽斯興借物爲比。感物爲興。義雖有二。其致則一。○誦螽斯而歷妃之德。徵于所生矣。樛木逮下。進御者衆。故生子多。編詩者以義相承也。

古序曰。桃夭。后妃之所致也。毛公曰。不妬忌。則男女以正。婚姻以時。國無鰥民也。

說曰。后妃不妬忌之德。刑于下國。凡男女之

有室家者。皆有樛木螽斯之風。故曰后妃所
致桃多子。其花有色。家園常植。故以比婦女。
先王令民仲春大會男女。是月也。桃始華。卽
時物爲比也。○誦桃夭而知后妃之化。徵于
國矣。雖庶民之家。未有閨範不淑。而能齊其
家者。然風教則自上始也。此亦詠歌之辭。朱
子以爲詩人因所見起興。則是桃花開時。見
嫁女者。而作此詩。以賞其女之賢也。說詩如
此。何異高叟。

古序曰。兔置后妃之化也。毛公曰。關雎之化行。則莫不好德。賢人衆多也。

說曰。邦國多士。文王之作人也。然有后妃之助。則王教基始。故當其寤寐。淑女友樂不忘。賢賢易色之風。始于閨門。而達諸朝廷。邦國士類興起。以至深山窮谷。芻蕘雉兔之輩。皆懷才抱德。足以待明主寤寐之求。所謂存神過化。遷善不知。王民之皞皞也。而皆自齊家始。故曰。刑于寡妻。以御于家邦。帷薄不修。而

能化家邦者未之有也故曰后妃之化明主
教之所始也○誦此詩者想見當世山林草
莽之士皆有肅恭之德而無播棄之憂下能
修之上能知之四友十亂所以奕世用之不
盡者皆關雎之助也後王艷妻煽處羣小蔽
賢周宗以滅聖人刪詩首二南有以夫

古序曰采芣苢后妃之美也毛公曰和平則婦人

樂有子矣

故曰采芣苢諷功故曰化采芣苢諷俗故曰美女

衆曰美國語云女三爲粲粲者美之物美者
吉善之名后妃不妬忌而宜子孫婦人以和
平而繼螽斯室家驩慶庶女胥悅故曰美也
其以茅苜比何也茅苜之實宜妊婦人所需
也閭閻安樂男服事乎置羅女服事乎蓄聚
室家無仳偶之憂而皆以生子爲願詩人託
詠茅苜見王民皞皞而古序惟以一美字括
之極精約非毛說未易會也事不必責實而
太平景象宛然詩可以興其斯之類朱註必

以爲采芣苢之婦人自作拘泥淺率甚矣○
此詩本詠王者化國之日不言朝野士庶而
言婦人不及織紵女工而託詠采芣苢終篇
變換纔六字一唱三歎恍然如見庶女于原
野間聞其謳歌之聲者詩所以善于言也
古序曰漢廣德廣所及也毛公曰文王之道被
于南國美化行乎江漢之域無思犯禮求而不
可得也

說曰前篇自關雎以下古序皆因首句爲目

此篇宜目爲南有喬木摘詩中語宜目爲江漢而云漢廣者取詩中廣字之義以表德也六經文字惟詩可斷取如曹風匪風大雅嘉樂之序皆然故毛公卽廣字義釋之始自宮壺遠及江漢可不謂廣與朱子詆其謬非也此序獨不言后妃者廣及江漢非內官之職統諸王者焉○江漢楚地其先鬻熊事文王受封先諸姬是爲聖教首善地漢廣汝墳正當其時國風不列楚卽二南可以觀矣夫子

師文王。刪詩錄。漢廣有心哉。齊魯不競。徘徊
陳蔡之間者數年。意在楚耳。昭王之不祿。天
也。儒者論春秋。夷楚何居。

古序曰。汝墳道化行也。毛公曰。文王之化行乎
汝墳之國。婦人能閔其君子。猶勉之以正也。

說曰。宋子謂文王三分天下有二。率商之叛
國。以事紂。故汝墳之人。猶以文王之命。供紂
之役。其家人見其勤苦。作此詩勞之。註疏亦
謂行役大夫之婦人作。或然而亦不必然也。

詩多託興非必皆其人自作或曰若是則何以爲風曰因是事爲是詩以鼓舞是人故謂之風近世學士傳貞女節婦亦曰以俟採風豈盡貞女節婦自作邪世儒言風輒稱里巷之歌拘也此篇首二章勞苦饑困不忘君子見其勤而貞後一章閔其君子勞苦勸以義見其正而烈行役者有此婦人卽其開家可知故曰文王之化也

古序曰麟之趾關雎之應也毛公曰關雎之化

行則天下無犯非禮雖衰世之公子皆信厚如
麟趾之時也

說曰周南以關雎始以麟趾終召南以鵲巢
始以騶虞終編詩者取德修瑞應之事若王
道之成也道化至此太平有象與古四靈畢
至之世無異故毛公曰如麟趾之時也商紂
之末俗奢壞禮關雎化行若桃夭之子兔置
野人芣苢漢廣汝墳之士女皆知守禮其貴
家世族子姓少而愿謹威儀容止振振有端

厚之風。故詩人託麟趾以表聖瑞。見文王修
齊之化成。而周道大興也。朱註以公子爲文
王后妃之子孫。以麟比文王后妃。以趾比公
子。於義牽強。按周南十一篇。皆以次自近及
遠。江漢汝墳之後。而及家庭。編次亦乖矣。序
說不可改也。○世祿之家。鮮克由禮。其子弟
飛揚跋扈。蛇冠而虎翼。由來漸矣。此詠公子
之賢。歸于振振。命之曰麟。稱其趾。其定其角。
歸然端莊謹厚。令儀令色。瞻之在前。辭約而

旨遠妙于形容矣

召南

說曰召南岐周地名召公奭之采邑風名召南而詩非召詩皆王教也周南岐豐首善王者之風也召南教行南國諸侯之風也周南亦有南國詩如江漢汝墳化由周達也召南無周詩專言化之及遠也周南醇懿粹美覺宇內雍熙召南轉移變動氣運方新皆始于閨門達于邦國也

古序曰鵲巢夫人之德也毛公曰國君積行累功以致爵位夫人起家而居有之德如鴈鳩乃可以配焉

說曰朱子改爲南國諸侯被文王之化詩人美其嫁娶而作非也序但言夫人之德不言爲某諸侯夫人則是凡爲諸侯夫人者皆當有是德也德何如王后妃之德厚載以承天故關雎思賢君夫人之德靜專以守成故鵲巢無爲然則何以首召南召南者諸侯之風

諸侯教國先教家召南首夫人之德亦猶周南首后妃之德也然則非文王之事歟曰是也而不必當文王時果有君夫人如此者文王教之皆欲其如此也若朱傳云南國諸侯能正心脩身以齊家其女子有專靜純一之德若是則紂時有兩文王兩大妣也何必然故毛公謂國君積功累行意以文王當之而亦不專指文王又云夫人起家居而有之意以大妣當之而亦不專指太妣見詩人所以

詠歌聖人所以編次二南者皆風後世人主
齊家治國之道而非按事指據也然則謂爲
文王之化又何也文王爲天子教天下則后
妃之德關雎也文王爲諸侯教國人則夫人
之德鵲巢也蓋教于王畿必始關雎教于列
國必始鵲巢其比鵲巢何也春鳥巢居正婚
姻之時鵲巢木杪最高太不取墮枝有尊貴
之義焉自冬至春始成有積功累行之義焉
戶牖背歲向太陰有下女之義焉鳩鵲鳩一

名鸛鵒南方之鳥不自爲巢遇鵒巢則託之
鵒亦安之他鳥未有若是者故爲受成之比
鳥唯鳩多族天子諸侯之配皆以鳩比而睢
鳩變化以比王后鳩鳩守成以比君夫人君
夫人比鳩鳩何也王者開創諸侯襲享封國
故周公作梓材曰以厥庶民暨厥臣達大家
以厥臣達王惟邦君邦君無爲受成而其夫
人可知也大雅曰哲夫成城哲婦傾城小雅
曰無非無儀無父母貽罹君夫人而欲壽成

毀巢之道也。故曰鵲巢夫人之德。

古序曰：采繁，夫人不失職也。毛公曰：夫人可以奉祭祀，則不失職矣。

說曰：朱子改爲南國夫人，被文王之化，家人叙其事以美之，非也。夫人猶前鵲巢夫人，不一定求其人，而其詩則皆文王所以脩身齊家教南國者也。序謂不失職，何也？諸侯冕而親迎，以重宗廟也。故修籩豆，奉祭祀，君夫人之職。然必有鵲巢之德，有親操之勤，有齊莊

之容然後可若采蘋夫人斯可矣惟文王大
姒足以當之苟南國諸侯夫人有若此者亦
大姒之教文王之化然而非必實有此夫人
也朱子謂美其君夫人而作固矣

古序曰草蟲大夫妻能以禮自防也

說曰朱子改爲大夫行役在外其妻獨居感
時思夫而作非也毛傳謂大夫妻初嫁來能
以禮自防是也稱妻者自嫁後既觀君子而
言草蟲阜螽皆螽斯之屬性善羣故以爲比

蕨一名鼈脚。可以茹薇。細豆苗。可以和羹。首
中饋之事。草蟲躍。蕨薇生。仲春之會也。蕨之
言別也。女子遠父母之比。薇之言微也。女子
寡小自謙之比。所以知爲大夫妻者。據編詩
首鵲巢。君夫人初嫁也。次采蘋。卽君夫人之
職。此章大夫妻初嫁也。次采蘋。卽大夫妻之
職。女子嫁。父母命之曰往。之汝家。必敬必戒。
新婦入門。良人未習。私懷憂慮。不以新昏爲
喜。以失禮爲憂。一則曰憂心忡忡。再則曰憂

心惓惓三則曰我心傷悲未見君子憂不釋
既見不覯憂猶不釋必其既見既覯憂心乃
平如此自防可謂知禮矣然詩非必此新婦
自作也詩人詠王化之所從來見文王所以
教南國莫非以禮齊家之事也○按是詩謂
初嫁之女自防則爲守禮謂獨居之妻思夫
則爲鍾情小雅以勞歸士體其情也召南以
詠賢妻貴其禮也故序確而正

古序曰采蘋大夫妻能循法度也毛公曰能循

法度則可以承先祖共祭祀矣、

說曰序于諸侯妻奉祭言不失職于大夫妻奉祭言能循法度何也君修法度臣奉法度者也故君不祭爲失職臣不祭爲廢法度凡祭備物行禮主婦職中饋薦豆採取烹芼器皿奠獻莫不各有法度大夫三廟宗子繼嫡世爲大夫其廟爲宗室非宗子而爲大夫其廟亦建于宗子之家祭則夫婦往宗子家行禮此皆所謂法度也詩詠季女大夫妻也主

人非宗故其妻稱季猶言少婦以別于宗婦也箋因季女之文遂謂大夫妻之未嫁者教于宗室三月告成于祖之祭然序旣言妻非未嫁之女女未嫁而出采蘋藻非法度也未嫁而親主祭于宗室尤非法度也箋附會詩辭與序不合而朱子遂改爲南國大夫妻被文王之化家人叙事美之尤拘也所謂大夫妻者言凡爲大夫妻當如是言妻而大夫可知也亦猶諸侯妻之有采蘋云爾

古序曰甘棠美召伯也。毛公曰召伯之教明二
南國。

說曰甘棠常棣也。其實味甘。故曰棠。仁人之
澤似之。故以爲比。召公爲西伯之大夫。敷教
南國。嘗舍止棠下。後人思之。託樹以致遺愛
焉。棠。黎屬。黎之言離也。去思之比。夫召伯之
教本皆文王之教也。人服召伯之教。愛召伯
而不知其教之所自來。所謂民日遷善而不
知爲之者也。思召伯而文王可知也。按召公

當文王之時。未稱伯。亦足以徵二南之詩。不作于文王之世。明矣。○是詩語緩而情切。辭約而旨深。不言召伯之仁。有言所不能盡者。千古去思。此爲絕唱。

古序曰。行露。召伯聽訟也。毛公曰。衰亂之俗。微貞信之教。興彊暴之男。不能侵陵貞女也。

說曰。霜化爲露。仲春之會也。女子幽貞。爲彊暴所搆。辱在泥塗。自視不勝沾濡。故以厭浥行露爲比。雀鼠比小入角牙。比爭辯。雀有角。

鼠有牙。比訟者之無情。皆詩人賦貞女之辭也。貞女守禮。而男子強求之。故訟守禮者文王之教。訟則紂之餘風也。朱子改爲貞女自述已志。豈以聖人使民無訟。而序言聽訟爲非邪。虞芮質成。亦訟也。姜里之獄。文王身不得免焉。孔子無訟之說。爲不知本者言耳。非謂聖人有訟弗聽也。唐虞之際。訟獄者不之堯之子。而之舜。及其爲天子也。臯陶爲士。夫非爲聽訟歟。誦此詩者。想見貞淑之氣如疾。

風勁草挺然孤秀女之有壯節者非徒婉嫵
柔質而已而召伯聽斷明允使幽貞之情得
伸雪于濁世文王之教遠矣哉詩人亦可謂
善于占誦矣

古序曰羔羊鵲巢之功致也毛公曰召南之國
化文王之政在位皆節儉正直德如羔羊也
說曰羔羊言鵲巢之功猶免置言后妃之化
也宮幃有專靜均一之德故朝廷有節儉正
直之風節儉故衣服有常正直故進退有度

羔裘者。大夫之法服也。羊柔順能羣。逆牽則不進。故以比正直。裁皮爲裘。方幅整齊。有正直之象。聯之以絲。羔小裘。美用皮多。純之以絲亦多。羊大皮少。絲止用五。其色又素。故曰節儉其儀。度安重。難進易退。故曰德如羔羊也。

古序曰。殷其雷。勸以義也。毛公曰。召南之大夫。遠行從政。不遑寧處。其室家能閔其勤勞。勸以義也。

說曰此詩猶周南之有汝墳大夫有此妻是
鵲巢之化行而大夫刑于可知也其託詠殷
雷猶汝墳之王室如燬也西伯率南國大夫
以服事殷故婦人以天威比王命殷雷聲比
殷商也南國至朝歌千有餘里而紂虐遠及
故曰雷在南山之陽何斯違斯徹之以思也
莫敢或遑勉之以勤也振振美之也歸哉憂
之也哀而不傷怨而不怒親愛而不忘公義
有婦如此豈非鵲巢之流亞歟然詩亦不必

其婦自作也。朱子改爲婦人思夫則降而爲變風亦可矣。何貴爲二南乎。

古序曰：標有梅，男女及時也。毛公曰：召南之國，被文王之化，男女得以及時也。

說曰：朱子改爲女子以貞信自守，懼其嫁不及時而有強暴之汙，非也。蓋以詩辭嫌于女求男，周旋其說云爾。愚謂男女居室，人情耳。葛覃之告歸，非后妃自告邪？商紂之季，王室如燬，男女失時，文王代行閭閻安樂，故女子

感時思歸猶豳風采桑之女殆及公子同歸
王民皞皞之象也王道本乎人情標梅人情
之至顧其詩非必卽出于其女之口而當世
民情有家之願宛然情雖切而不苟且遷就
往必待求求必以時容非文王之教邪其託
詠于標梅何也梅之言媒也孟春梅始華華
落則實實漸多則華漸少而仲春至正婚姻
之期矣然託詠不於男而於女何也詠於女
子而後見性情之至也二南之化皆自中閨

始耳。

古序曰：小星惠及下也。毛公曰：夫人無妬忌之行，惠及賤妾，進御於君，知其命有貴賤，能盡其心矣。

說曰：小星夫人猶鵲巢采繫之夫人也。朱子謂能不妬忌以惠下是也。謂南國夫人被文王之化，衆妾美之而作，則拘矣。詩人歌此，謂凡爲君夫人者，皆當如是也。蓋妬忌女惡之大者，不妬忌女德之大者。后妃之關雎亦惟

思窈窕無傷善之心而已。君夫人而使衆妾
皆得進御。安其分。無怨言。則亦有關雎之風
焉。其以小星比。何也。不敢自同于大明也。猶
諺云。衆星不敵一月之意。衆妾進御。昏入晨
出。昏入則星見于東。晨出則星見于西。卽往
來所見爲比。然亦非必其進御之妾所自作
也。

古序曰。江有汜。美媵也。毛公曰。勤而無怨。嫡能
悔過也。文王之時。江沱之間。有嫡不以其媵備。

數媵遇勞而無怨。嫡亦自悔也。

說曰：禮諸侯一娶九女，二國媵之。夫人與媵各有姪，有娣爲九。夫人進御君所，則媵從。嫡初歸，不以媵備進御之數，或勞使之，而媵亦無怨。嫡感而自悔，故詩人作此以美媵。見媵之賢，而嫡之所以能悔者，皆關雎之化也。其以江有汜比，何也？物無情，莫如水，而江以納衆流，故大物大，則小者從。媵從嫡，亦猶是也。支流分而復合，比媵始棄而終見收也。然何

以知其不爲美嫡也。曰詩代爲媵言則爲美
媵矣。以汜自比以江比嫡。賢女恭順之辭也。
小星自託以日月之光比夫人。江汜自況以
洪流之量比正嫡。知命守分所以爲賢女。而
朱子改爲媵待年于國。嫡不與偕行。後嫡悔
而迎之。媵作此詩。非也。蓋惑于箋獨畱不行
之語。夫彼所謂不行者。不同宮中進御之行
也。非謂在母家不同嫁也。如待年不行。豈得
嫡亦何從而勞使之乎。

古序曰野有死麕惡無禮也。毛公曰天下大亂強暴相陵遂成淫風被文王之化雖當亂世猶惡無禮也。

說曰朱子改爲女子自守不爲彊暴所污詩人因所見以美之近似而古序必曰惡無禮何也蓋紂時淫昏成俗而羞惡之心人所自有文王化行皆知無禮之可惡故詩不貴其貞潔而貴其知恥也知恥則不屑不潔此導民之本格心之化也序言及此非經聖裁未

易苟作麋鹿比奔也死麋死鹿如惡惡臭醜
詆之辭也末章述女子羞惡之情言老吠則
雖狗彘亦惡之矣如朱說因所見則是詩人
適野見死麋死鹿士包茅以遺女女罵于室
犬吠于門而賦此詩也何以異于說夢乎凡
朱子言詩類此宜其以古序爲鑒空也

古序曰何彼穠矣美王姬也毛公曰雖則王姬
亦下嫁於諸侯車服不繫其夫下王后一等猶
先帝道以成肅雝之德也

說曰召南有此王姬猶周南有公子皆王教所漸也王姬雖嫁于諸侯而其儀衛較諸侯尤貴能不以貴驕其車馬僕從謙恭柔順所以可美朱子謂爲武王以後詩是也疑平王爲東遷之宜曰齊侯爲齊襄公諸兒非也二南皆追誦文王齊家治國平天下之化所謂平王齊侯云者如書大誥稱武王爲寧王酒誥稱爲成王商頌稱契爲玄王易云康侯周禮云寧侯皆非定諡也平正也齊一也如均

平蕩平。齊聖狗齊云爾。皆美其祖父之德。見男女家教有本。卽文王之孫。下嫁諸侯者也。若謂東遷以後之詩。則當入王風。宜曰諸兒。其名字何足以辱簡策。而廁諸二南之間乎。其以唐棣比何也。唐棣之華。并蒂攢簇。有類聚親睦之象焉。故以比兄弟昏姻。而桃李多子。鈞絲相連。故以比男女也。

古序曰。騶虞鵲巢之應也。毛公曰。鵲巢之化行。人倫旣正。朝廷旣治。天下純被文王之化。則庶

類蕃殖蒐田以時仁如騶虞則王道成也

說曰周南終麟趾而國族張故爲關雎之應
召南終騶虞而品物遂故爲鵲巢之應蓋好
德者其子孫必賢貞靜者其發生必盛化始
宮幃近乎遠應非倖致也朱註以爲文王之
化則是以爲美南國諸侯非也蓋召南雖諸
侯之詩非必諸侯能爲召南也言文王所以
教南國者仁及鳥獸草木功贊化育非聖人
不能而于召南言之者所以終之也南方卑

濕多生蘆葦野獸成羣故以爲比非謂鵲巢
獨能致騶虞關雎獨能致麟趾也以麟應鳩
以騶應鵲比類屬辭云爾非專主鳥獸也毛
云仁如騶虞則是真以騶虞爲獸而配麟後
儒因謂騶虞白虎黑文或謂騶虞尾長于軀
引漢武帝獲異獸騶牙爲徵蓋因虞叶作牙
而附會之不足信也騶虞本二官名月令田
獵命僕及七騶春秋傳晉悼公使陳鄭爲御
六騶屬馬蓋騶者乘御掌馬之官書舜命益

作虞周禮有山澤之虞掌禽獸之官射義云
天子以騶虞爲節樂備官也田獵備官而所
取不多五豕而殺一其仁也如此故歎美之
不敢斥君而呼騶虞騶虞之仁卽君之仁也
○誦騶虞而王者仁贊化育矣始于閨門施
于朝廷邦國達于天下以至天地泰和品物
咸亨脩齊之效蔑以復加已故夫子謂伯魚
曰人而不爲周南召南其猶正牆面而立也
與蓋王道以誠意爲本誠意以刑家爲先夫

婦至暱也。閨閤至隱也。倡隨至便也。其切近
至不可離也。故君子慎獨勿欺。必自此始。于
此真能如見賓如承祭。無隋行無逸志。然後
可以事父母。對兄弟。家人而無忤色。然後可
以處朋友。事君使民而無愧心。然後可以格
鬼神。孚豚魚之夷狄。蠻貊可行。文王純一敬
止。又得大姒之助。故其存神過化。風行草偃。
民日遷善而不知。皆脩身齊家。刑于寡妻之
積效也。士君子進德修業。內有賢配。則事半

功倍。苟不幸而帷薄不淑。則肺腑受病。非若藩籬垣牆。可委而棄之也。其事瑣于米鹽。其幾密于嚙笑。耳目心志。錮閉其中。而無適可離。故必刻勵衾影。以求底于正。然後家可齊。國可治。未有道不行于妻子。而能行于疎遠者矣。面牆而立。豈不誠然。或曰。二南之詩。皆里巷之謠也。曰。此高叟之說也。蓋周有天下之後。追思當時流風善政。歌詠潤色。以詒式穀。此皆周公之制作也。孔子刪定于周衰之

季以示來許。若使在文王之時而民謠有此。則將焉用周公孔子爲也。學者誦二南。不必按事求徵。但據古序以繹作者之志。脩身齊家治國規模具在。明辟王以之。洪化理而士君子以之。資進脩。洋洋美德哉。孟子曰。待文王而後興者。凡民也。豪傑之士。雖無文王猶興。周公曰。文王我師。孔子曰。文王旣沒。文不在茲乎。此之謂也。

毛詩序說卷之一終

毛詩序說卷之二

京山郝敬學 男洪範輯

門人彭大翮

侄千里校

邶

說曰邶鄘衛皆商畿內之地今河南衛輝府淇縣卽古朝歌紂都也武王滅紂分朝歌以北爲邶南爲鄘東爲衛邶鄘不詳所封衛以封康叔其後邶鄘皆併于衛各因其地所得

之詩分爲三國其實皆衛詩也以首變風何也二南成而周王朝歌侈而殷墟關雎基治綠衣兆亡紂覆于前衛滅于後所以明戒也古序曰柏舟言仁而不遇也毛公曰衛頃公之時仁人不遇小人在側

說曰朱子改爲婦人不得于其夫而作非也忠臣不得于君與賢女不得于夫情相似故忠臣常託賢女自鳴怨而不怒不遇而不忍去序所以目爲仁人也以辭害志故似婦人

語其實非也。舟以比濟世。柏木芳香。後凋。以比君子。柏舟泛流。比仁人不遇也。

古序曰。綠衣。衛莊姜傷已也。毛公曰。妾上僭。夫人失位。而作是詩也。

說曰。莊公惑于嬖妾。夫人莊姜賢而失位。故作此詩。其以綠衣比何也。婦人衣夫者也。夫人位中宮。黃者中央之正色。雜之以青。則爲綠。青。木氣也。克土。以比中宮之見逼于旁。蘗也。衣爲上。裳爲下。表爲貴。裏爲賤。比嫡妾失

所也。此詩莊姜自作。故序云傷已與載馳竹竿之類。凡婦人自作者。序自分曉。朱子于他詩一槩謂爲自作。非也。○正風雅後爲閨怨者多矣。綠衣之怨。婉喻而不直其事。憂嫡妾失所而不及私情。渾厚端莊。不激不怒。所謂可以怨者邪。

古序曰。燕燕。莊姜送歸妾也。

說曰。莊姜無子。以陳女戴嬀之子完爲已子。莊公卒。完卽位。嬀人之子州吁弑之。故戴嬀

大歸于陳。莊姜送之。而作此詩。其以燕燕比
何也。燕雀春來秋去。以比聚散。燕雀依人。爲
孚子也。故玄鳥爲祈子之祥。莊姜之於戴嬀
以子相依。子亡而相失。故以爲比。不言夫死。
子弑。國破。人亡。而託興燕燕。關山寥落。隻影
孤飛。淒然有流離之感。至曲終奏雅。未亡人
之志。有如皦日。千古離情。此爲絕唱。

古序曰。日月衛莊姜傷已也。毛公曰。遭州吁之
難。傷已不見。答於先君。以至困窮之詩也。

說曰朱子改爲莊姜不見答於莊公呼日月而訴之非也州吁之亂莊公卒矣夫人傷國難之不定非不見答也呼日月者詩之情境以比夫婦非專爲告訴日月也

古序曰終風衛莊姜傷已也毛公曰遭州吁之暴見侮慢不能正也

說曰終風且暴比賊子飛揚跋扈莊姜爲州吁作也朱子改爲傷莊公而作非也誦綠衣日月而莊姜蓋溫惠婦人耳必無恚忿過當

之辭。此詩爲母憂子。則謂之賢母。爲婦怨夫。則傷于怒矣。毛說是也。

古序曰。擊鼓。怨州吁也。毛公曰。衛州吁用兵暴亂。使公孫文仲將。而平陳與宋。國人怨其勇而無禮也。

說曰。擊鼓。踊躍輕佻之狀。凡輕佻者。無謀易師之象。曰。師貞。夫人吉。以兵爲戲。州吁所以亡也。故曰。詩可以觀。謂興爲無義。則所失多矣。

古序曰。凱風美孝子也。毛公曰。衛之淫風流行。雖有七子之母。猶不能安其室。故美七子能盡其孝道。以慰其母心。而成其志耳。

說曰。朱子改爲七子自作。非也。凡詩人美刺。代爲其人之言。非必出其人之口。然則何以謂之道。性情曰。聲音之道。自與性情通。詠其事而可興可觀。卽是性情之理。非以其人之詩。觀其人性情之謂也。詩以凱風棘心比何也。美其子之孝。則不忍斥其母之不善。故若

爲幾諫也者。以達孝子和氣之衷。凱風以比和氣。棘小聚叢生。以比七子也。爲孝子言。則凱風似母。棘心似子。爲詩人言。則凱風棘心皆諷其母之微辭也。凱樂也。物通淫曰風。棘之言急也。心花藥也。俗云棗花多心。婦不貞之比也。棘性晚發。夏始生。心東風吹桃李。則男女及時。炎風至。標梅落。而棘始生。心非桃夭之時矣。母生七子。猶有淫行。詩人不忍言。母老而但言子晚成。勞凱風之吹。善諷諭也。

棘雖非大材。叢生可爲籬。中赤而外多刺。比
七子衛護一母也。二章比薪。三章比水。子雖
無用。足供薪水。豈其悅母。不如黃鳥乎。黃鳥
應節。又爲審時之比也。

古序曰。雄雉刺衛宣公也。毛公曰。淫亂不恤國
事。軍旅數起。大夫久役。男女怨曠。國人患之。而
作是詩。

說曰。朱子改爲婦人以夫從役于外。思念而
作。非也。詩人託閨怨以刺宣公。意不主閨怨。

也。後世詩多擬閨怨者。何必盡婦人自作邪。篇名雄雉。猶齊風之雄狐也。雄雉善雉。小弁云。雉之朝雝。尚求其雌。泄泄其羽。狎雌之狀也。雉之言恥也。若以爲婦人思夫。意象不類。古序曰。匏有苦葉。刺衛宣公也。毛公曰。公與夫人并爲淫亂。

說曰。朱子謂是詩。未見其爲刺宣公夫人。然亦何知其不爲刺宣公夫人也。序有所受之。以匏比者。匏剖爲瓢。有配合之義。昏禮合卺。

用匏。故以比男女之合。匏未剖。可佩以渡水。
匏之渡水。潛行者用之。非利涉之正禮也。故
以比男女之私。匏尚有葉。無作合之具。水深
比防閑之嚴。雉雝善淫。鴈飛有序。匏以行險。
舟以利涉。各有取義也。

古序曰。谷風刺夫婦失道也。毛公曰。衛人化其
上。淫于新昏。而棄其舊室。夫婦離絕。國俗傷敗。
焉。

說曰。谷風東風也。東爲君方。君子之德風也。

習習不斷也。谷之言俗也。俗成于習。谷風習而成陰雨。君德習而成民俗。故以爲比。朱子謂詩中不見化其上之意。改爲棄婦自作。非也。風人美刺。鮮有直陳者。設以身處其人之地。代爲其人之言。心曲隱微。皆肖其人。所以爲妙。于性情而可風也。若謂棄婦自作。微婉之致。全失之矣。

古序曰。式微黎侯寓于衛。其臣勸以歸也。

說曰。朱子疑詩中無黎侯字。以爲鑿空。愚謂

有黎侯字不成詩矣。

古序曰旄丘責衛伯也。毛公曰狄人迫逐黎侯。黎侯寓于衛。衛不能脩方伯連率之職。黎之臣子以責於衛也。

說曰朱子謂序見詩有伯兮二字遂以爲責衛伯非也。蓋衛之先本牧伯也。武王封康叔。誥曰外事汝陳時臬司師茲殷罰有倫。此衛爲伯之始也。司馬遷作世家衛自頃侯以前七世皆稱伯。黎侯以狄難來告。正望其脩先

業也。故曰與曰同。皆連率之事。以旄丘葛比者。前高後下曰旄丘。丘之不斷截者也。葛亦不斷之物。俗稱狐疑爲葛藤。毛遂云從之利害。兩言而決。日出而言日中不決。卽此意也。朱傳謂久寓于衛。時物變而登丘見葛以起興。豈其然。豈其然。○旄丘之怨。從容不迫。雖當流離之秋。期望之至。而其言委蛇有序。篇終乃曰。褻如充耳。諷刺微婉。氣象從容。詩所以爲性情之道而善于言也。

古序曰。簡兮。刺不用賢也。毛公曰。衛之賢者。仕於伶官。皆可以承事王者也。

說曰。朱子改爲賢者自作。不得志而仕於伶官。有輕世肆志之心。若自譽而實自嘲也。夫輕世肆志。豈風人之度。譽而自嘲。則談諧耳。六經無此體。求其人而不得。遂以爲賢者自作。又疑碩人美人爲自誇。遂以美人爲君。以碩人爲自譽自嘲。其實非也。序云。刺不用賢。蓋當時實有賢人不見用。仕爲伶官者。詩人

刺其不用賢者。則衛君之咎也。

古序曰。泉水。衛女思歸也。毛公曰。嫁於諸侯。父母終。思歸寧而不得。故作是詩以自見也。

古序曰。北門。刺仕不得志也。毛公曰。言衛之忠臣。不得其志爾。

說曰。朱子改爲賢者不得其志。因出北門而賦以自比。非也。夫出自北門。如涉彼北山。出其東門之類。北門背陽。以比昏主。凡刺多比北。美多比南。以爲實然。則固矣。詩人託爲仕

者之怨以刺時耳非必仕者自言也

古序曰北風刺虐也毛公曰衛國并爲威虐百姓不親莫不相攜持而去焉

說曰朱子謂衛以淫亂亡國未聞有威虐者夫亡國之君誰不威虐卽州吁弑君宣公殺子孰有如其威虐者而謂未聞非也

古序曰靜女刺時也毛公曰衛君無道夫人無德

說曰君無道故外無防閑夫人無德故內多

醜行。詩人不欲直斥。因借淫者期會贈貽而
諷之。以正賢。賢易色之意也。靜女。謂貞靜之
女。首章刺其君壞防。故以城隅比城。四隅有
敵臺。最高峻。大雅曰。哲夫成城。哲婦傾城。城
者。內外之閑。禮義之比也。國君以禮厚防。誰
敢踰之。所以爲搔首踟躕也。二章刺其夫人
無恥。古后妃夫人有女史載彤管記過。故動
無非禮。小雅曰。既立之監。或佐之史。彼醉不
臧。不醉反恥。所以樂古人有形管也。三章詩

人自比猶鄭風之言縞衣綦巾也郊外曰牧
茅秀曰蕘賤而潔白比編氓之婦守禮人皆
羨之況爲上者乎諷刺微婉緼籍所謂主文
而譎諫言之者無罪也朱子改爲淫奔之詩
意索然矣

古序曰新臺刺衛宣公也毛公曰納伋之妻作
新臺于河上而要之國人惡之而作是詩也
古序曰二子乘舟思伋壽也毛公曰衛宣公之
二子爭相爲死國人傷而思之作是詩也

說曰。誦衛風至新臺二子。天理民彝。斬然盡矣。狄人乘之。國遂以亡。其禍皆始于幃薄之間。詩首二南。繼之以邶。法戒豈不章明哉。

鄘

古序曰。柏舟。共姜自誓也。毛公曰。衛世子共伯蚤死。其妻守義。父母欲奪而嫁之。誓而弗許。故作是詩以絕之。

說曰。共姜未嫁。而共伯先死矣。男子冠而後娶。女子笄而後嫁。詩稱兩髦。則共伯尚未冠。

而共姜尚未笄也。髦，毛同，髮也。散之曰髮，結之曰髦。古者幼學稱髦士，卽今垂髻也。兩髦，卽也。分髮作雙髻，曰卽。俗云丫髻，童子之飾。齊風甫田，總角卽兮，是也。共伯以總角亡，故序曰蚤死。父母共姜之父母，共姜在室，父母欲以別嫁，亦人情也。蓋女子旣嫁，夫死守節，常禮也。未嫁而誓死，人情所難。故鄘風首飾之，漢儒解兩髦爲翦髮夾凶子事父母之飾。按禮言髦多矣，其皆翦髮夾凶者邪？禮經具

在。未聞子事父母而翦髮者也。詩獨言母者。女子之嫁。母命之也。

古序曰。牆有茨。衛人刺其上也。毛公曰。君子頑通乎君母。國人疾之。而不可道也。

說曰。君子頑。宣公之長庶伯昭。倭之兄也。宣公卒。惠公朔立而幼。伯昭烝于朔母宣姜。故詩人以牆茨爲比。茅蓋牆曰茨。牆以蔽內。覆之以茨。揜蓋之比也。惡之深而思爲揜蓋。忠厚之至也。

古序曰君子偕老刺衛夫人也毛公曰夫人淫亂失事君子之道故陳人君之德服飾之盛宜與君子偕老也

說曰此詩本刺而但亟稱其服飾容貌所以寓誨淫之意首言君子偕老諷以義也姜之不能偕老甚矣次章云玼兮玼之言玼也猶新臺有泚之泚汗顏也三章云嗟兮笑而見齒曰嗟猶竹竿巧笑之嗟可笑也皆諷刺之微辭

古序曰桑中刺奔也。毛公曰衛之公室淫亂男女相奔。至於世族在位相竊妻妾期於幽遠政散民流而不可止。

說曰朱子改爲淫者自作非也淫者犯禮法竊人妻妾惟恐人知詩人表暴其事指其所竊之女與其期會迎送之地事本幽曖而踪跡昭彰所謂如見肺肝也沫鄉衛朝歌故地紂所都也周公作酒誥稱妹邦又稱妹土變沫言妹者妹少女也淫昏之名易歸妹天地

不交萬物不與君子以求終知敝妹之象也。
唐菟絲也無根而附于物苟合之象。唐言宕
也。荒淫曰宕。麥秋不收冬不藏三時在外謂
之宿麥有奔之象。百物未長而先秋有淫之
象。葑蔓菁也義取下體賤其褻也。葑言風也。
馬牛通淫曰風。孟姜指淫婦弋言引也。唐言
賤也。皆微辭所以爲刺。

古序曰鶉之奔奔刺衛宣姜也。毛公曰衛人以
爲宣姜鶉鵲之不若也。

說曰衛風至此入道盡矣。不再造，不可以國故繼之以定之方中。

古序曰：定之方中，美衛文公也。毛公曰：衛爲狄所滅，東徙渡河，野處漕邑。齊桓公攘夷狄而封之。文公徙居楚丘，始建城市而營宮室，得其時制，百姓說之，國家殷富焉。

古序曰：蝮蝥止奔也。毛公曰：衛文公能以道化其民，淫奔之恥，國人不齒也。

說曰：此詩朱子以爲刺序以爲止奔，女子有

行不知命皆止之辭。

古序曰相鼠刺無禮也。毛公曰衛文公能正其羣臣而刺在位承先君之化無禮儀也。

說曰刺羣臣無禮而託詠于相鼠何也。喻相人也。鼠之附人不可除而貪盜爲人所共棄。故生而無爲于世者。惟鼠人欲其速死無所俟者。亦惟鼠故以爲戒。相鼠相視死鼠也。或云相鼠拱鼠也。關尹子云聖人師拱鼠而制禮。陸機云河東有大鼠能人立交前二足于

舞上跳舞善鳴韓愈詩有云禮鼠拱而立卽此鼠也二說未知孰是

古序曰干旄美好善也毛公曰衛文公臣子多好善賢者樂告以善道也

說曰詩美好善而但言車旗何也衛自中衰國運萎矣諸大夫艱難再造改圖脩省以志于善是以文物一新夫國非善之難而惟無好善人之患書所以貴一个臣也十室之邑必有忠信浚邑豈乏姝子而干旄在郊則自

此大夫始也。詩人不貴有姝子，而貴有此大
夫。故盛稱其車旗，所謂見羽旄之美。聞車馬
之音，欣欣有喜色者也。篇末更屬望姝子，則
大夫益增重矣。詩所以善占頌也。

古序曰：載馳許穆夫人作也。毛公曰：閔其宗國
顛覆，自傷不能救也。衛懿公爲狄人所滅，國人
分散，露於漕邑。許穆夫人閔衛之亡，傷許之小
力，不能救，思歸唁其兄，又義不得，故賦是詩也。
說曰：朱子改謂許穆夫人將歸衛，而許大夫

有來止之者。夫人憂之作此詩。蓋據首章爲
實事。非也。若使夫人果啓行。許大夫果跋涉
來追。則詩中登山采蠶行野踏麥。皆實事矣。
豈比興之義。然則云大夫跋涉何也。禮諸侯
夫人。父母終。無歸寧。惟使大夫問于兄弟。所
謂跋涉之大夫也。據禮託言。非真有既行追
畱之事。蓋衛之亡也。許以昏姻。力不能救。亦
當爲之請于大國。而許人坐視。無一介之遣。
夫人所以憂也。三章言采蠶。蠶。且母也。爲女

于遠父母之喻四章言麥麥宿于外爲女子
適他邦之喻諷許君而但斥大夫與國人云
不如我所之隱然恨許國衆人無一男子耳
慷慨有士氣故序曰許穆夫人作貴之也

衛

古序曰淇奥美武公之德也毛公曰有文章又
能聽其規諫以禮自防故能入相于周美而作
是詩也

說曰綠竹蒹葭也禮記大學引此詩作蒹竹

小雅云終朝采綠草似竹而澀礪一名木賊
可以攪洗垢膩磨盪器具故比切磋琢磨也
朱子謂淇水多竹漢世猶然漢志武帝塞瓠
子下淇園之竹爲撻寇恂伐淇園之竹爲矢
此皆誤于綠竹之文附會過耳竹性宜濕產
于南土禹貢竹材矢箚取諸荆揚北地高躁
故豫貢無竹材世稱渭水淇園以希貴見稱
非其土產也凡傳註訛久卽真多此類朱子
于竹竿之詩亦以竹爲衛物恐未然也

古序曰考槃刺莊公也毛公曰不能繼先公之業使賢者退而窮處

說曰此詩但道賢者巖居岑寂而莊公不能用賢之失自見朱子改爲美賢者隱處澗谷非也賢者隱處澗谷至于獨寐獨寤獨言寂寞無與語是誰之咎所以爲刺也

古序曰碩人閔莊姜也毛公曰莊公惑於嬖妾使驕上僭莊姜賢而不答終以無子國人閔而憂之

說曰此詩本爲閔莊姜作而無一語道其憂
閔之情與莊公不答之事但極稱夫人族類
之貴容貌之美來嫁之儀及齊國之富祗就
恆情易曉者開譬而莊姜之賢不足爲昏主
道也意婉而辭厚所以善于諷刺首章自齊
來嫁三章乃抵衛褰衣卽景衣士昏禮女登
車姆爲加景乃驅鄭之丰亦曰衣錦褰衣駕
予與行是也

古序曰氓刺時也毛公曰宣公之時禮義消亡

淫風大行。男女無別。遂相奔誘。華落色衰。復相棄背。或乃困而自悔。喪其妃耦。故序其事。以風焉。美反正刺淫佚也。

說曰。朱子改爲淫婦爲人所棄。自序而作。非也。風人美刺微婉。而刺尤鮮有直者。惟二雅端慤有之。若民間謳歌。較臣子忠諫之情。自寬如必直斥某人某事善而後爲美。某人某事惡而後爲刺。亦不達于風人之志矣。此篇本刺無一語譏詆。但代棄婦自言。而風旨棧

然才覺此詩之爲刺者無羞惡之心者也故
毛公曰美反正刺淫佚也今以爲棄婦自作
豈肯詳道其醜如此即使自道有何風旨而
聖人錄之氓蚩貿絲覺悟之辭也無知曰氓
蚩蚩無知貌男本狡獪貌爲忠實以欺婦人
耳昏姻之道男下於女布絲皆女功布賤絲
貴以絲易布女子自賤之比也三四章言桑
者喪也失節之比因首章貿絲及之至是始
覺男子之狡耳此婦人先合後奔終乃見棄

者也

古序曰竹竿衛女思歸也毛公曰適異國而不見答思而能以禮者也

說曰朱子謂是詩未見不答之意遂改爲思歸寧不得而作非也使直言不見答則怨矣不見答而憂憂而不直所以爲厚女子不得其夫其情良苦然其言紆緩不激不露但末繫一憂字而所憂之事室家相違之情皆寓于此釣用絲比夫婦相屬也身在他國遠思

釣淇淇雖有魚釣豈能及比夫婦不相維繫也泉源淇水本同一地或左或右比室家相違也獨笑獨行無儔侶也悠悠之水與盈涸者異檜松之木與早彫者異比人不如物也其義微婉三復可知豈必悲傷泣涕然後信其爲不見答乎

古序曰芄蘭刺惠公也毛公曰驕而無禮大夫刺之

說曰按春秋傳云惠公之卽位也少芄蘭草

系以比童稚禮國君年十三以上治事成人
與庶人童子異然有成人之度乃稱成人之
服若驕蹇放肆猶之童子而已朱子謂此詩
不可考當闕夫衛惠公之爲童子非不可考
也而謂當闕則三百篇之著姓名者無之
古序曰河廣宋襄公母歸於衛思而不止故作
是詩也

說曰按此詩作于衛未遷國之先宋襄公爲
世子時也衛都朝歌在河北宋都睢陽在河

南至戴公避狄難渡河文公營楚丘則衛宋皆在河南而襄公始爲諸侯耳此詩慈母念子不爲不切而不可則止之義隱然言外詩之婉而不盡類此彼說詩者必欲直言而後信何與

古序曰伯兮刺時也毛公曰言君子行役爲王前驅過時而不反焉

說曰朱子改爲婦人以夫久從征役而作非也詩人託閨怨以刺時猶擊鼓雉之類非

必婦人自作也。首章以邦桀執父其刺曉然。
古序曰。有狐刺時也。毛公曰。衛之男女失時。喪
其妃耦焉。古者國有凶荒。則殺禮而多昏。會男
女之無夫家者。所以育人民也。

說曰。朱子改爲寡婦見鰥夫欲嫁之而作。真
以此詩爲二人偶語。非也。當世或有所指。亦
不必遂爲寡婦自作也。未有心欲嫁其人而
又訾之以爲狐者。狐妖物也。以爲比。明是刺
語。

古序曰木瓜美齊桓公也。毛公曰：衛國有狄人之敗，出處於漕，齊桓公救而封之，遺之車馬器服焉。衛人思之，欲厚報之，而作是詩也。

說曰：此詩蓋作于齊桓公既死之後。衛文公忘齊人再造之恩，乘五子之亂而伐其喪，故詩人追思桓公，諷衛人之背德也。夫子作春秋，諸侯未有書名者，衛文公滅邢，書名，刪詩存木瓜，惡不仁也。桓公率諸侯城衛，遺之車服六畜，繫馬三百，所投良厚。詩言瓜李者，見

往來之禮薄施猶當厚報況如齊者衛無以
報奈爾身死而遂伐之事辭甚明朱子改爲
男女贈答之辭所謂好成古人之惡者也儻
謂序說無據男女贈答又何據乎

王

說曰王王城也周之東都今河南府是也初
文武都豐鎬爲西周成王東營洛邑奠九鼎
以時朝會而王仍居西京至幽王嬖褒姒黜
申后太子宜臼奔申申侯率大戎弑幽王西

京遂亡。晉文侯鄭武公共立。宜曰：于東都是
爲平王號，令不行，地方僅六百里，無以異于
列國。故東都之詩，謂之王風，其以次衛何也？
衛與東都皆殷墟也。紂亡于前，幽厲踵于後，
故以東周繼衛。

古序曰：黍離，閔宗周也。毛公曰：周大夫行役至
于宗周，過故宗廟宮室，盡爲禾黍，閔周室之顛
覆，彷徨不忍去，而作是詩也。

古序曰：君子于役，刺平王也。毛公曰：君子行役

無期度。大夫思其危難以風焉。

說曰。朱子改爲行役大夫之室家思念而作。非也。詩稱畜產卽匪兕匪虎之意。刺王不以人道使人也。思夫而詠及牛羊雞棲。自是尋常耕牧之家。不似大夫妻若泥君子之稱僚友相呼亦然。豈獨婦人得稱其夫乎。此詩人託諷。非必婦人自作也。

古序曰。君子陽陽。閔周也。毛公曰。君子遭亂相。爲祿仕。全身遠害而已。

說曰。此詩猶衛風之簡兮。士不得大用。并求
爲抱關擊柝。而亦不可得。溷跡優人。且陽陽
自以爲樂。豈非世亂時艱。居高位者爲難免
乎。故序曰。全身遠害。而周室之衰頽可知已。
王者詔爵祿。馭富貴。士生王國。厄窮若此。詩
人所以閔之。朱子改爲婦人美其夫。則辭旨
淺陋甚矣。又謂卽前篇君子之婦。尤爲迂闊。
王國行役。未必止前篇君子。而婦人思夫。未
必止前篇君子之妻。何據而知此兩篇并出。

一手也。

古序曰。揚之水刺平王也。毛公曰。不撫其民而遠屯戍于母家。周人怨思焉。

說曰。王室有難。諸侯之師戍之。侯國有難。方伯連率救之。天子制命者也。未有徹畿內之兵。下戍侯國者也。申侯召犬戎弑幽王。滅宗周。窮凶極惡。法所必討。申有楚難。平王反遣畿內民爲之戍。懷立已之恩。而忘殺父之讐。天理民彝泯滅矣。詩人不忍直斥。但託揚之。

水以刺其衰微。蓋是時周室播遷，非有餘勇可賈，特以受人施者畏人，欲不爲之役，不可得耳。寄生之天子，旣不能令六百里之甸卒，無人踐更，故行者有不均之歎。然必責六師同行，雖盡發洛邑老稚，亦不足矣。力寡弱而使人又不以道，所以怨之。苟師出有名，討賊興復，如夏少康一成，一旅人，誰敢輕視爲揚之水哉？夫子刪詩存此篇，刪書錄文侯之命，其作春秋託始平王垂戒遠矣。薪辛也。楚愁。

也。蒲逋也。民辛苦愁思逋逃。故以爲比。
古序曰。中谷有推。閔周也。毛公曰。夫婦日以衰
薄。凶年饑饉。室家相棄爾。

說曰。朱子改爲婦人自述其悲怨之辭。非也。
凶年饑歲。夫婦不相保。婦見棄而不忍去。詩
人傷之。故辭曰。有女仳離。安在其爲婦人自
作也。中谷。溝中也。推之言推也。推而納之溝
中。寓言夫棄婦也。推草耐旱。一名充蔚。一名
益母。充裕益母。寓言富歲多賴。今歲凶多暴

也。

古序曰：免，免閔周也。毛公曰：桓王失信，諸侯背叛，構怨連禍，王師傷敗，君子不樂其生焉。

說曰：鄭莊公爲桓王卿士，王奪之政，鄭伯不朝，王伐之。鄭伯敗，王師射王中肩，天下遂以輕周。故詩人閔之。宋子改爲：君子泛然憂亂而作，非也。免，走雉，飛上下之比。走者自得，飛者被羅，比王師敗績于鄭也。免，言毒也。雉，言癡也。鄭伯寤生也，反復詠歎我生寐而無寤。

寓鄭伯倡亂五霸作而王綱墜詩人之志與
春秋之義同也蓋鄭莊公敗王師于繻葛此
霸者無王之始自是以後桓文迭興諸侯相
攻而天下大亂故曰我生之後尚無爲我生
之後逢此百憂王跡熄于五霸春秋作于詩
亡正以此也後儒言春秋辨五霸失免爰之
意矣

古序曰葛藟王族刺平王也毛公曰周室道衰
棄其九族焉

說曰：采子改爲民去鄉里，家族而流離失所者，自作蓋誤解。謂他人父爲稱，他人爲父，非也。詩以葛藟比兄弟綢繆，葛藟生于山，不生于河，水在河，不在山，以比兄弟望潤澤而不得也。兄弟相親，以父母同也。不顧兄弟，卽是不顧父母。謂他人爲父母也，不直斥其薄而諷之以二本，所謂怨而不怒也。如朱說流民適異國，呼他人爲父母，則文義鹵莽甚矣。古序曰：采葛懼讒也。

說曰朱子改爲淫奔者託以行指其人而思念之非也一日三秋韓愈所謂日隔之疎加以忌者之說也若以爲閨思是委巷之言也讒口傷人每乘其間隔故曰一日不朝其間容刀君臣相與近則親而遠則疎君子日在君側精誠可以直通羣小有所畏而不敢小人譖君子必伺其間隔蓋君子易退而難進是以孟軻致主憂十寒于退後趙高竊秦使二世深居人不得見而後馬鹿之計行霍光

出沐而後上官之譖入自古小人排君子權
奸欺庸君未有不始于離間而終于陷害者
詩人憂一日不見其慮深矣詩可以觀殆是
類與如以爲淫奔之辭失之千里

古序曰大車刺周大夫也毛公曰禮義陵遲男
女淫奔故陳古以刺今大夫不能聽男女之訟
焉

說曰朱子改謂周衰大夫有能以刑政治其
私邑者故淫奔者畏而歌之非也當時若實

有此大夫則此詩之作爲無謂矣。謂爲刺之而非惡也。謂爲美之而非賢也。奚取而歌焉。子云。聲色之於以化民末也。聽訟吾猶人。必也使無訟。聞車聲而恐見服色而懼。古之大夫猶能聽訟。今之大夫聽訟未能。是以爲刺。古序曰。丘中有麻。思賢也。毛公曰。莊王不明賢人放逐。國人思之而作是詩也。

說曰。朱子改爲婦人望其所與私者不來而疑之。據詩中留字解。非也。按留人姓也。古者

因土錫姓中州有陳畱漢有畱侯通作劉晉
士會奔秦反而其子有畱秦者遂爲劉氏國
策云處者爲劉春秋周大夫有劉子卽其族
也今加作者穢汙之名失聖人刪定之旨謂
序說無據朱又何據謂國人思賢望其來則
悠然可風謂婦人思男子疑有畱之者則醜
惡而不可道矣

序說卷之二終